



明詩正聲卷之四

五言古詩四

廣陵

盧純學

選輯

江一夔

校閱

趙康王枕易

秋夜長

漫漫秋夜長唧唧寒螿吟白露下青草悠悠傷
我心傷心耿不寐孤坐鳴素琴朱絃中斷絕轉
軫悲餘音推琴步明月仰見雙飛禽緬懷牧犢
子潛潛淚沾襟丰神宛如在悵望空梁陰



睦樺

陂上荅潘笠江

陂開浚野東堂接夷門道聊用安卑棲敢云慕
高蹈良辰適在茲褰裳一登眺苔徑何縈紆葭
洲亦窈窕嶼雲斷復連林日暖仍曜海鳥自飛
翻沙禽相叫嘯遇物感時移論心思久要身同
北渚吟情豈南窓傲酌桂靡與歡擷蘭徒盈抱
賴歌郢中篇庶以永所好

送舜符

疇昔慕遊遨與君數朝夕稍申初服懷共結沉
冥迹促膝究微言披情閱仙籍眇昧恣丘樊留
連媿泉石星霜歛云變婉戀成離析撫景念夙
驩即事興今戚末路誰能同素心不可易淒淒
冬日黃渺渺寒流碧暫舍故園林遠適京華陌
時有北風翔因聲慰寥寂

周憲王

擬古

明月上東樓流光照西廂秋風動簷竹清韻搏

琳琅起視河漢間
牛女角光芒寒泉自嗚咽
白露空零灑感茲樂清境
塵慮永相忘

其二

西陸起涼飈高梧墜秋葉
出戶聞寒蛩開窓見
明月美人天一方傷情久
離別離別有所思夢
寐恒見之凜然霜雪操
潔如冰玉姿為言持貞
素榮悴安可期

其三

南風生晚涼松院淨如掃
披衣起終夜開軒月

皎皎浮雲橫天河清露挹
芳草此際良獨懽悠
然釋懷抱

秋日有懷

朝露散百草秋光忽云暮
黃蘆披淺灘紅葉辭
高樹西風颯然來涼思滿
庭戶踈枝寒蟬咽晴
霄塞鴻度對茲百感生
引領獨凝佇
多憤

贈余無且併寄胡茂承

分藩豫章郡地勝有餘樂
爽氣浮雲峰江流帶

高郭心賞希良朋豪素獲所託胡生實燕婉十
載阻京洛每睹鴻雁賓永嘆遠行客余子璠璣
美抗跡戀丘壑傾蓋成深交時論連日夕遊者
既未返處者復離析載誦招隱篇清風振叢薄

高叔嗣

再調考功作

弱冠蒞大梁慷慨多奇志師事鳴臯子擔簦竊
自異幾窮柱下策頗識壁中字雖非國士才通
人嘗予器始辱狗監知終奉龍門贄弛負歸中

朝持戟備末位孤根難為容名過易生累一官
歲再移彌取簡書忌眷然懷夙昔回首日增慨

雨中簡子仁員外

積雨曠朝暮層城苦沉沉端居誰與言抱此懷
人心一為軒冕拘遂使名跡侵長媿玄豹姿隱
霧南山岑君通微妙理佇想開塵襟

送別永之

憐君方遷戍况我嬰愁疾一別苦流光相從竟
何日平生託交游弱冠弄篇帙書韻藏名山功

期銘石室安知事不就跌宕情如一已矣復誰
陳今亦返蓬華

古歌

荆和當路泣良璞為誰明茫然大楚國白日失
蕪城燕石十襲重魚目一笑輕古來共感嘆今
予亦吞聲

栗應宏

雜詩

驅車出秋郊禾黍倏以黃鳴蜩喧我側野鳥棲

其旁悵望陟高壠烟樹鬱茫茫荒冢何累累遊
子渡河梁人生如遠行前路安可量白日當空
麗奄忽入陰涼呼朋酌斗酒百慮除我腸

徐階

示張生巨川

蟋蟀鳴前除白露沾我衣東園桃李花冉冉委
芳姿日月各異行會合諒有時功虧在一篲九
仞安爾為中夜耿不寐玄覽紆遐思渴飲白石
乳飢食青雲芝至寶不自愛棄置通路衢悠悠

荆山泣千載有餘思

唐寅

驄馬驅

悠悠驄馬驅道阻歲云晚豈無同裘士念子不能飯木脫辭故枝去家日已遠鳴鷄戒前道夕暝猶策蹇筋力已非舊淚下不可卷

李仁

答馬蘄州淮

膺組涉湘潭識君在蘄澳沙墟冬已懷竹輿春

始驚連峰眺雉堞絕壑瞻華屋嶺複有遐思江深無近矚已就馬融遊還從季主卜沉沉松下堂采采山中簌興至輒傾壘曲揚時振木信宿西來帆間關東去轂浮雲值飄風聚散一何速所期堅寸心同擷歲寒菊

張時徹

門有車馬客行

門有車馬客乃自鴈門關下馬投車轄入門脫行纏自言簪纓胄尺籍隸長安幼好縱橫術熟

覽黃石篇身隨漢驃騎逐虜祁連山本謂功名
易寧知道路艱冰霜落毛薊白日頽華顏歸還
故里閭親戚皆凋殘附鳥須附鸞菀園須菀蘭
為謀自不審失路將何言生不入虎穴死當赴
龍淵徘徊長嘆息惻惻摧心肝

秋懷詩

晨興擘衣裳驅車騫長薄幽壑屢洄泐層阿遞
縈絡赤坂蒸陰雲叢林隕飛籜栖栖城樹烏繞
繞野田爵形影自相吊臨風長躑躅

中秋對月雜詠

零露悴百草金風振柔條層霄月亭午寒光映
沈寥覃敷被八極俯鑑析秋毫豈不盛靈曜覆
盆終不昭閭娒蔽謠詠蕢菜傾申枿靈均與賈
傅泣涕徒為勞

雜詩

東風吹野草皎日薄郊垆丘中有逸士荷鍤事
耦耕朝飡巖上華暮采隰中苓青雲為帷蓋白
石為軒楹親暱相讌樂懷此黍稷馨雖無五鼎

貴庸樹千秋名

北征雜詠

羲和無停軌寒暑更相易歲暮誰不歸獨為遠
行客荆榛當路衢烏鳶翔我側疾風吹沙塵白
日忽以匿筋骨既憔悴感此增怵惕悠悠赴壑
鱗戢戢歸林翼物性有如此行役不遑息閭闔
不可攀閭風不可即果腹適莽蒼浩蕩將安極

邾城行

朔風吹枯桑原野莽蕭疎烟火杳不接十室九
逃逋鄉土豈不戀官司急徵輸上有貪令尉下
有點里胥膏血寧幾何浚取乃及膚親戚不得
顧豈復念田廬空囊擔破釜黑夜牽妻孥白晝
俱伏匿奔走不遑舒亦知不免死且復緩須臾
頽垣栖鼠雀長隰翳榛蕪隣邑亦以然王賦將
誰需寄語長民者為牧不為屠

秋懷

落葉不可綴墜景不可振荆榛彌路隅疾風起
酸辛朝為膠與漆夕乃胡與秦談咲起干戈桃

李各有因額保金玉姿去去勿復陳

其三

上山莫采璵下山莫采珠明月長蒙恚懷璧竟
罹誅申狄不庇身屈原自捐軀姱美為眾忌侏
儒未云鄙鈞曲公侯封弦直道邊死高舉虬塵
埃逍遙廣成子

馮震

俠客行

五陵俠少年被服盡羅綺白馬金絡頭雪毛照

流水攘臂長楸間走縛南山兕餘技未及陳仰
手接飛雉自恃才力雄被酒過都市朱亥不足
論劇孟非所擬一醉吐然諾輕生如脫屣昨聞
兵符至單于寇北鄙召募出玉門橫行數千里
殺馬鬻寶刀叱咤威風起射縛左賢王歸以獻
天子

華察

遊善卷碧仙樓

落日下空門齋鐘出林莽偶茲叩精廬再宿翠

明言上卷
微上舊遊不知處但見松杉長巖虛露氣清坐
覺心魂爽月白山窓高夜靜風泉響遂令寤寐
中超然脫塵網雲壑永可棲願言稅歸鞅

秋日施子羽姚山人見過

掃徑秋色佳衡門遲來客山厨薦園蔬戀賞淹
日夕荒臺蔭叢桂徙倚對巖壁夜靜人意閒潭
空月華白信宿愜所期去住欣自適養生慕彭
聃學道窺莊易願言保微尚歲晚成三益

宿玉陽山房

返照明溪梁深松晦夕景巖卧符夙期雲陰石
牀冷因投物外心遂入清虛境天寒木葉疎月
落山房靜然燈獨不寐秋宵一何永

澄觀樓曉坐

曉色澄秋林霞明映山翠貪竒事夙興爽氣醒
殘醉空霜日夜繁坐見木葉瘁天高宿霧收白
雲出平地初日照重巖寒流響虛隧景物清心
魂泠然起遐致

晚至湖上

山中讀書罷來憩澄湖濱綠陰暗溪路草堂靜
無塵平生滄洲意烟波夢垂綸石梁度落景花
渚藏餘春閒情狎魚鳥悠然適吾真雲天澹晴
霽空水明衣巾未遂乘桴願徒懷江海人

廖道南

燕岳陽樓贈韓守邦彥

翳予錫嘉名自幼好奇服興懷慨鬻熊馳情追
力牧改歲辭朔易茲晨赴南陸崇樓俯江險傑
構屯雲復張樂臨夢野開筵敞靈谷鉅浸日月
暝層濤天地澳飛雨洗塵氛奔景蕩心目淵龍
儵隱見沙鳥時迴復恍疑玉華宮良覲金娥淑
贈我屈子蘭報之湘妃竹

李開先

田間詩

往歲苦行役歸來田舍客耕夫時讓畔野老與
爭席牛馬散平原鋤犁掛敗壁趨時非所長舍
此將焉適

陸采

感事

春風動高林柔萋夜忽落客心感盛年涕下流
丹腹我心良悠悠世事恣訾譴抱玉詣明庭乃
自刖其足傷哉夷吾子三戰而三北不有鮑子
知鄙行委泥壑丈夫未升達誰辯龍與蠖

劉汝松

送李進士之京

春風飄岐路朝日照高城青陽既駘蕩林薄亦
芬榮之子去安適迢遙入承明皇居一何麗雙

闕凌太清白馬振長綏丹陛羅群英匪才慚寡
用高步羨芳聲盛年志四海豈徒夸與名

其二

迅足慕長道勁翮思遠揚人生若絃筈良會豈
有常願得同婉孌何乃天一方愛至望亦深念
之結中腸不及塞門鴈仰視浮雲翔

其三

感時睠景光逡巡及春暮清川去不極日月奄
馳驚君才日已茂我髮日以素孤寒謝明時飛

明言山志 卷之四
沈邈異路形跡信乖違悽惻一還顧亭亭山上
松冰霜色如故

王寵

丙洞

天傾霞石開日映雲門敞芙蓉綉絕壁菡萏排
仙掌下窺黯無垠側眺紛有象丹藤蔓冰壑蒼
苔蝕銀榜野鹿浥飛泉寒兔逃平莽攀蘿眷仙
靈折麻私嚮往訪道空名山前途浩漭漭誰令
濁世憂扣我雲霞想

飲顧淄川榮夫

昔掌淄川徭今耽竹林賞解龜豈年及乘日非
外獎偶會禽尚心彌肆雲蘿想經始中園廬蘭
橈蔭閒敞清池過庭激紫蔓綠籬上薑芋抽新
萌蒲萄牽宿莽差池墮鳥覆澆澗驚魚響息陰
聊舉爵臨流時抱杖英英白雲游纚纚鮮飈蕩
興遠集蕭晨蘊真愜吾黨蟬蛻迹已冥鸞翔意
俱往方敦霞外交言稅區中鞅

寺門望虞山

明言山產 卷之四
禪門吐靈氣前與虞山通大海蒸巨壑烟嵐日
龍葱蓮花挺秀巒繡障羅高空飛泉四時雨福
地千年宮蛟蜃時出沒青天乍舒虹是節屬夏
首灌木敷丰茸鶯啼紫巖曲鹿驚青林中薰風
蕩蘿蔦沃雨鮮篁叢蹇予抱沉瘵未得窺瓊瓏
還期覽日出夜半千崖紅

沈愷

擬古

今夕復何夕微月生東方有美曠不接脉脉遙
相望豈伊川途阻盈盈一水長願言往從之欲
濟河無梁七襄豈不美弄杼不成章疑情何時
洽沉思鬱衷腸安得陽臺雲化作雙鴛鴦

園中雜言

中歲不自好營慮相糾纏寧如返初服停策倚
林泉豈不羨松喬生本無仙緣鍊形得長生此
事終茫然有溪亦可漁有山亦可田營已良已
足踰分詎自全青陽不再御朱華苦易捐欣然
命卮酒且以娛天年

唐詩

浦子木遊吾故鄉賦詩餞別

路長一何悲悠悠我所思上有白髮親下有黃
口兒柰此愴中腸臨風何依依咄嗟子力薄安
能將我歸

張詩

深州城南樓集

皓月鑒晴空流雲逝飛閣遠樹暖蒼蒼寒煙紛
漠漠溱沔壯風濤恒嶽挺嵒岨瑯闌珠斗橫畫

棟銀河落寶劍獨專征金尊共行樂西顧太行
山南眺邯鄲郭虎踞霸氣湮龍戰雄圖索榮華
有消沉道德靡厚薄懷因望遠抒賦感登高作
山中夏暮將登華山與白石李子

暑宴天氣清涼風先秋發嗟我山中人振衣遠
遊越明發亂河流暝宿華頂月青林祕壁門緋
煙藹金闕仙靈事幽討峰巒競砒斨日月窮往
還雲霞變興沒咸池采月華高春晞予髮遐荒
無端倪心胸蕩溟渤引領逢佳人揔轡志靡忽

張虞卿

雜詩

青青江湄草關關洲渚禽物類各有待因時樂
相尋念予久漂泊感遇情難任豈無他人好咸
非心所欽所思在遠道河關阻重深炎寒屢變
節魚鳥空浮沉離憂孰共語強自彈鳴琴錯亂
不成調悽愴發哀音孤鸞與別鶴此曲傷人心

其二

幽谷有佳人懷玉佩衆芳肌膚榮霜雪精采凌
朝陽允惟聖明匹曠世愁鸞皇何物昧蹇脩二
好成參商歧望路伊阻感此心孔傷風雲會有
期山川聊徜徉

盧楓

幽居

閉門謝賓客焚香讀墳典至理忽冥契茅茨日
午轉翠栢生暮寒夕照落窓淺起來瞻白雲天
際自舒卷

其二

霜雪瘁百草古栢陰以森勁節不受變迺比君
子心世俗多謬舛頽風不可禁飄飄浮丘子遺
世在雲岑

其三

玄鶴海上來雲程幾萬里飛翔向我鳴乃是舊
山侶予家東海上田廬間洲渚鶴從何日來青
松長幾許殷勤與鶴語鶴亦整歸羽付汝舊綸
竿掛我珊瑚樹

明詩正聲卷四

明詩正聲卷之五

五言古詩五

廣陵

盧純學

編輯

江一夔

校閱

薛甲

贛州道中

結髮從宦遊飄蓬轉天涯昨辭章門柳今泛虔
南槎虔國非我鄉炎方非我家我家湖水曲結
屋青山崖秋露忽已零不採簷前華空復夢中
往失路生咨嗟

陳鳳

集桔芳園

初陽散高原佳氣溢郊甸群葩既歲蕤豐草亦
葱蒨濯濯雲錦張盈盈露珠泫獨行心自怡客
至情彌眷相携林中遊復此松下宴聊傾丘壑
懽何意簪裳戀群公且淹留旦夕花如霰

鄒頤賢

雜詩

踈懶已成癖視世無所營杖策過林臯天地何
空濛俯見流水逝仰觀浮雲征品物自閒適欣
欣向南榮六龍忽西匿嚴霜勵寒聲萬有皆息
機而人獨吾生感此造化理脩短無異情

張謙

東門行

步出城東門泛彼河上舟河流東北馳念子悵
悠悠子行一何遠乃在渤海頭白日照遼陽朔
風吹高丘王事各有程焉得斯須留執手淚盈
把杯至不能酬垂楊夾廣衢有鳥聲相求感之

增煩惋然彼道路修丈夫自有懷豈若兒女儔
贈子明月珠照耀光九州所期在同心千載以
為速

送項生之粵二首

寒風吹落木蕭蕭下江渚把酒送征人躊躇不
能語顧予涼薄質託君以為輔一朝遠別離單
居復誰與惆悵浮雲生緬懷岐路阻感彼雲間
鴻哀鳴慕儔侶恨無凌霄翼相隨以遐舉

思君亦何遠杳杳雲樹隔同生天地間俱為遠
行客君行入粵疆予將騁燕陌倏忽成參商何
以慰朝夕日暮江波平天靜晚山碧佇立不可
見淚落衢路側予心諒能察匪為兒女戚各務
明德期矢之以白石

周復俊

登龍泉觀作

丹荒起靈壤員嶠帶芳洲積波沃陽陟商嶺粵
玄陬方春理東作行泉激平疇羣公切時隱聊
與采真遊前途秣金馬潔宇飛文鳩繡軫畫蔬

麥青黥炫神丘踈桃明近遠萸柳耿稀稠俯觀
時物育予衷良悠悠緹騎襲修堤簫鼓起道周
舍車入松華遐矚凌雲幽曲磯紆石規側磴寫
懸流彷彿登雲門邪溪澄遠眸竹細莽於荻林
冥望若憇高下陟層巘清深俯靈湫蕭然池閣
暝颯若風雨秋泳鱗沒雲影隴禽相忻啾時和
戎馬閒尊俎坐銷憂山阿多桂樹日夕此淹留

李遷

自浮圖峪行邊至馬水

褰帷寒山岑顧望金水隩嶽峯歷層巘窸窣入
幽谷秋深晦長晝夕潦益平陸危谿互縈迴哀
湍目奔觸荆榛被蹊徑虎狼蹲林麓天險踰金
湯地維控荒服皇都宅燕薊定鼎雄郊鄩羯奴
屏毳幃諸將閒羽燾微臣蒙位遇揆已匪頗牧
碌碌無竒勳北面覲推轂

劉汀

送張石河

良辰命夙駕送子出城圍冠蓋如雲集觴豆亦

已陳平生愛款洽氣結何不伸渺渺雲際樹悠
悠清路塵君振鴻冥翼予淹匏繫身對飲不開
顏念別徒愴神醉起一揮手去住各逡巡肝膽
貴相傾離合安足論

靳學顏

藍田道中

遠薄藹葱蒨危峰抗峻朗晡鬱紺烟流娟妙璫
臺上靈境澹無言神理渺難放牽翠披林深弄
珠抱泉爽物性總怡悅人和信駘蕩將諧遺世
情庶永幽期賞撫景謝良晤沿流牽念長軒丘
有絕控綺園非近響悵矣託深衷縈茲玄谷想

許應元

讀殷近夫集

殷侯本岸瑋氣與烟霞親一朝被組綬濩落隨
風塵為吏山水間給事金馬門榮遺志乃得道
屈命茲屯瓌詞發靈性逸響振青雲變彼楚執
珪咄咄將誰言

駱文盛

送友人之江右

江上雨初霽西風委群芳別離當此時黯黯中
自傷之子舍我去匆匆戒舟航我有盈觴酒送
之清溪傷酒盡為君歌歌聲一何長知音日已
遠引領徒慨慷

包節

平越夜行

侵星飭徒侶畢景驚修岑流雲還暮山歸鳥棲
舊林伊余不遑寐勞勞陟崎嶇山形既綿亘叢

薄鬱蕭森崇岡虧朗月密木蔽層陰虎豹當路
號猿狖擁條吟仰睇何遼邈譁誼盡夷音駕言
何所之將邁昆明潯故鄉眇天末所思安可任
強仕

咏向長

子平謝累辟雅志在隱居乏食或有餘取足反
其餘讀易深自悟世界等蘧廬謂貧富不及謂
賤貴不如勅言昏嫁畢家事母關余同好有禽
生肆意相與娛五嶽遊躅徧高風映簡書

喬世寧

憶遠

朝采水中蒲暮采水中蘭
蘭蒲蒨華滋枝葉何
團團拳拳不盈手
涉水良獨難豈貴蘭與蒲
將以貽所懽所懽在萬里
愁思來無端涼颼應秋
期蘭芷凋芳妍盛時君
不見衰謝徒長嘆

王問

送陳祠部

東風吹江樹烏鳴何嚶嚶
清晨携斗酒送子東
南征僕夫早嚴駕前驅已
抗旌攀歡靡相及
嬋媛我中情

對雪懷陳山人

密雪灑溪陰驚風墜簷瓦
窮麋投空臯飢鳥噪
中野對此愴不怡思彼巖
居者山深無四鄰幽
懷向誰寫

馮惟訥

荅別詩萬吳俞王諸子
時解陽羨北歸
執手莫惆悵吾將歸故鄉
感子歡意促念此別

長身百木薄衣原野被繁霜江濤西南來瀕
洞凌舟檣洲上雙鳴鳥倏歛衝門翔不辭毛羽
頽所嗟忽分行徘徊顧舊渚感激增煩傷

萬虞愷

妾薄命

古來妾薄命莫以青春好寵極妬方深息情那
到老昨日含咲花今朝斷腸草翻恨西風遲凋
零不如蚤

龔秉德

晚登平陽鳳山有作

崇山表峩峩縹緲群峰外緣嵐躡層巔遙看海
門對興遠寄薄遊情愜符勝槩陽谷散綺霞陰
崖破蒼靄雲烟識性靈蘿薜牽衣帶平臨寰宇
闊俯視滄溟大偶茲憇石門忽與山僧會有時
松風生萬壑發清籟雨餘山色佳月上林光碎
夷險雖異狀晦明有殊態陟巘復降原篁逕轉
飛蓋匪為肆窮探冀全山水愛倘逢採芝翁願
言謝流輩

月言
卷之五
蔣孝

冬日惠山作

夙負山水癖，惠麓成獨往。高原木葉盡，巖岫出
林莽。靈泉散古甃，細石發清響。寒蕪澗道遠，落
照洞冥朗。捫蘿入精廬，欲覓生公講。從茲寶林
隱，日夕寄遐想。

皇甫汈

春日隱居

從宦蹇無成，竭來務田畝。悟身一虛幻，萬事夫

何有。怡曠始自茲，逍遙眇長阜。遠墟絕行塵，東
風搖谷口。薜荔靄清川，雲霞生蔽牖。隱几忘吾
言，嗒焉喪其偶。

皇甫濂

別子循兄赴黃州

川途蒙霜雪，之子懷遠征。携手及初載，感物感
已盈。山林備含晦，驚鳥兼離聲。百卉歛徂化，隆
松表其貞。繁星流曙光，白石鑿以明。駕言邁荆
牧，揚舲越江城。訟牒莅遐方，投沙屬遺英。紆鬱

風波意慷慨雲雨情喟余有所思湖水廣且清
微尚愜黜直寧憐濯長纓阻深嘆無從斯須獻
款誠

春日訪于鱗天壇道署

曉出城南郭芳坳展新矚柔萸秀綠野和煙蕩
華旭穹壇結翠氛玄宮麗瑤玉雲門藹以深芝
臺歷紆曲彼美丘壑姿寢瘵寄遐躅淪躓警宿
心恬曠憺方足既擬長卿慢兼抱邴生欲道勝
物自遺神閒象不束緬此逸世途媿無區中祿
至理非空筌亮懷在微勗且申離索情茲往誰
為告

汪坦

君子有所思行

君子有所思所思邈不期入室各自媚出門寧
復知肝膽向誰是蹲沓欲何為野田飛黃雀高
不過蓬茨赤鳳搏紫霄文采光陸離鯨鯢困泥
滓螻蟻尚制之螻蟻細小蟲縱橫亦惟時

感懷

山深風雪零天寒日將暮迴車遠行邁荆棘彌
廣路高堂棟已撓埃壒冢軒戶夔魍雜魍魎盤
薄復馳驚安得巫咸招天閻或可覩

其二

黃狐號野外白楊風蕭蕭遊子遠行邁顏色慘
不驕墳墓日以荒松柏日以凋四時茂蒸嘗羈
旅無尊匏感此摧肺肝淚下沾綈袍

其三

落日多悲風噉噉雙鳥啼云胡百年內生死多
別離死者不復生生者日含悽牽牛與黃姑相
望一水湄脉脉不得語耿耿猶相依

均州道中

西風吹浮雲欵向東南馳遊子在萬里行道多
逶迤衣裳既已寒菽食恒苦饑悠然懷小星賦
命各有宜溝壑苟或忘安用丈夫為睠言歸故
園將採南山薇

茅坤

叢山關曉發

山色秀可掇况復游子襟涼雲寫曲澗白日耀
高林竹間露猶泫岩阿風乍沉人烟互葱蒨樵
路仍嶮嶽安得携良朋於此援鳴琴拂衣一鼓
調山水揚清音

曹大同

贈陳司寇梧岡

弱蘿附灌木枝蔓日上尋君子縻好爵糾纏意
彌深握瑜不得售摧藏湖海陰雖愧陽陵曲寧
無流水琴高誼激頽風惟覲尖升沉惠而能好
我貽以瑤華音簡書迫王程含意終難任非君
美無度孰為勞寸心

劉鳳

擬古

歲月浩漫漫別離安可期游子在萬里于冬寒
無衣形影何由接夙昔夢見之鴻鴈思南翔朔
風鳴北枝氣候亦何早榮華亦已槁行雲中路
返憂思亂如擣君心猶白日不照我懷抱路長
當努力慙慙向誰道

其二

迢迢清路塵悠悠濁水泥皎皎令顏色飄飄蕩
子妻燭燭明月滿燦燦羅幃低何為榮盛時終
歲作孤嫠君身自無定棄置不須啼

其三

離離月初生衆星燦以明涼風隨時發槭槭枯
條鳴螻蛄亦何哀翩來集我庭起視千里間但
見玄雲興蕭條思故鄉虎豹正縱橫展轉不能
寐攬衣步前楹浮沉各異域何由薦中誠親愛

不斯須聚落如辰星寄命一世間忽若朝露傾
相去當萬里顧影獨煢煢安得携手歸與子相
逢迎

李攀龍

錄別

秋風西北來蕭蕭動百草蕩子無室家悠悠在
長道紅顏能幾時棄捐一何早對客發素書零
涕復盈抱上言故鄉好下言故人老

其二

大江多悲風秋日澄清陰浮雲無本根天路難
重尋故人一失所結交良苦心游子易慷慨撫
劍吐哀吟白髮行蕭蕭繁霜悴我衿登城望四
野明月照北林悠悠委他鄉中懷安可任

代曹子建

丈夫志萬里忼慨事四方我后振威靈六軍乃
激揚分旗建東嶽耀武臨江湘鳴鏑控流颺利
劍捷秋霜長驅下淮泗人馬自生光戈矛何參
差方舟正縱橫何言為國讎一舉被舊疆解徒
旆言入歌舞旋許昌離宮大饗士勞賜以次行
君子念在御賦詩垂華芳

代王仲宣

方舟何翩翩素波亦蕭蕭薰葭澹餘映長檣激
流颺撫劍登高岡人馬且逍遙空城何所有殺
氣蔽旌旄日夕見煙火四野飛蓬蒿邊聲起大
江誰知我心勞從軍誰復樂菲薄愧鉛刀

代劉公幹

我后赫斯怒整駕東南征六軍如飛集列植龍

日詩上卷
一
陂城皚皚霜風至肅肅戈甲鳴長飈轉砂礫仰
視白日冥流波一何勁金鼓悲且清連鳶下青
雲毛血灑隰垆發機入微妙觀者無不驚壯士
以忼慨各奮先登情釋此薦嘉客濡翰敘平生
篇章信綺麗新詩雅以精小臣在緹幕起坐懷
同聲戎事諒非難但恐沈痼嬰

謝茂秦

謝榛吾黨彥軾軻京華陌黃金自不留朱顏亦
已擲韋布豈盡愚咄嗟名士籍握手金閨人中
情多所適冠蓋羅長衢染翰日相索遂令清廟
音乃在褐衣客一出遊燕篇流俗忽復易還顧
望鹿門矯矯青雲翮

酬元美

妾本秦宮女少小揚蛾眉早辱君王寵朱顏驕
自持卷衣皆羅紈明珠縱橫垂頭上翠琅玕爵
釵珊瑚枝盛年處深殿容華天下知一朝在里
巷遂為生別離此身託古歡南山猶可移東隣
蕩子婦泥沙委路岐中心指秋日同穴乃所期

古意寄余德甫

明月照我牀清風感重闌遺書發懷袖彷彿見
容輝古歡匪自今游子當何依千秋一高唱豈
獨知音稀莫言苦行役極宴不如歸努力兩黃
鵠為爾故鄉飛

沈明臣

擬遺我一端綺

遺我一端綺言出鮫人室素絲欺秋霜黃紋奪
朝日雲霞錯流輝山川緯瑤質火鼠不為珍

蠶吐難匹裁縫被我體坐以彈朱瑟

擬三載為千秋

三載為千秋令儀眇難即嫵婉追舊驩相思安
可極娛樂感君私未及敬妾席層軒網蛛絲飛
塵翳華鳥寤寐難再期惻惻明河夕

武陵莊雜詠

華館敞綠野修篁壓崇垣翳然蒙水木青雲永
為樊感時願偃息古道終龍蟠調膳餌玉屑酌
醴斲乳源被服豈不佳結束惟蘅荃冲襟溯往

古默默誰為宣

泊西陵江口

夜泊西陵關江平月如練天空水氣收萬狀殊
可見歷歷海門山青浮一痕線微茫不盡處恐
是桑田變隔水靜吳峰寒波濕宮殿四顧無人
聲開篷坐相眷風吹白苧裳露下沾團扇撫景
彈青絲長魚立波面老龍眠不深時將鼓雷電
倏忽潮聲來長年始稱便揆柁駕長風船開疾
如箭

庚午孟春日汪開府伯玉暨群從仲蔚仲
淹仲嘉吳仲足仲圭南榮相與尋討山谷
勝地盤桓久之因述旅懷示同遊者

吹萬何細縕春山澹無色烟莽百卉肥條枝膩
柔碧歲星指孟陬良辰攝提格造物不我待寒
暄遞相迫玄化幹洪陶萬象布陽德飛鳴各有
情欲止不可得羈懷空鬱紆招邀出阡陌憇息
嘉樹陰杖策長林側藉草傾壺觴高岡屢登陟
天地曠無垠山川眇睽隔遊子懷故都所樂匪

終適歸鳥投夕林空羨寧飛翼

眺大闌山遙寄劉仙

劉仙名綱字伯常後漢下邳人曾為上虞

令

仙人劉伯常銅墨棄如徒秉心事白君吐納授
玄理煉石青霞區餐髓丹峰裡夫婦獲秘術魚
獺相嬉戲昇仙謝喬枝墮虎乃故履事閱千秋
往炯跡垂外紀山遐白日曠虬蛄駕誰駐吾謠
白雲章馮風一相寄

遙望樊榭

樊夫人名雲翹劉綱妻也同仙去

雲翹有遺榭言寄五霞中五霞絢天地照耀金
銀宮日月飄珮纓步搖鳴天風虹蜺作高梁白
榆樹前墉粲粲啓玉齒言笑陪仙翁豈邀萼綠
華相往遨崆峒或引董雙成騎鳳凌八鴻願言
蛻凡骨下女以相從颺然回風至眇昧空鴻濛

同言正聲

卷之五



